

敬

事

草

敬事草卷十一目錄

請補各官及科道揭帖

問安揭帖

紀召見 啟祥宮事

擬 聖諭揭帖

催發 聖諭揭帖

奉 聖諭揭帖

繳還 聖諭揭帖

錄內降各差三十處密旨

問安揭帖

擬上三諭揭帖

問安揭帖

問安揭帖

回 聖諭處南太僕留二卿揭帖

不傳 聖諭揭帖

言由本兵揭帖

請三事揭帖

趙侍郎可兵部揭帖

日講揭帖

辭寧鎮捷恩第三疏

言李贄揭帖

請講寶訓揭帖

救前任科道揭帖

謝前事揭帖

請加恩禮部揭帖

報入閣揭帖

言寶坻牧場揭帖

言田本兵揭帖

言黃河事揭帖

三輔臣存問錄廕揭帖

請東宮講讀揭帖

廣東稅事揭帖

言稅契銀揭帖

言趙邦清揭帖

河工事宜揭帖

熟審揭帖

催發二事揭帖

陝西織造揭帖

言稅契揭帖

敬事草卷十一

柱國少傅燕太子太傅吏部尚書中樞殿大學士臣沈一貫

請補各官及科道揭帖

臣惟人主以安社稷靖萬民為本務以設官分職率作考成為要務牧民之道譬之牧牛羊然今有牛羊於此而不寄托于人以為之牧則盜賊之所竊豺狼之所噬存者幾何而更望其蕃育乎惟民亦然人主不能自牧而分寄于百官以為之牧苟寄之不得其人與不得其法則閭閻

閭之盜賊山澤之豺狼盡是也而民何以生其
究不使民盡化為盜賊豺狼不已也若是則萬
民不靖而社稷將危不利亦大矣故有一官則
有一官之職官不可使不備而職不可使不舉
官闕而不備責在銓衡之臣職溺而不舉責在
紀綱之臣而振率銓衡之臣與糾虔綱紀之臣
是誠明主之事非可聽其因循敝壞而無精明
晬晬之觀也比者 皇上建彞倫之極備孝慈
之行莫萬世之本開有道之長天下臣民欣欣

思見德化之成而猶此跂望莫有慰心者惟是
仁心仁政猶未周浹故耳今所謂銓衡之臣吏
部是也所謂綱紀之臣都察院是也往之為部
院者率多不職宜為聖心之所厭棄自頃以
來皆爭自濯磨仰承休德以愛君體國為懷以
徇私滅公為戒臣樂與之共事庶幾治平故諸
臣有違闕臣不敢不儆戒于下以相成而諸臣
有湮鬱臣不能不道達于上以相助臣觀吏部
之所苦者莫苦于推補之未盡而都察院之所

苦者莫苦于差遣之不敷此皆國家之忠計

皇上之所宜體亮者也蓋推補科補兩部為之
委任責成而誰任司牧之寄差遣不敷則莫為
之稽程舉刺而牧職亦不能舉揆厥所由多部
之失于銓衡而院之失于綱紀咎將安辭能不
為明主瀆乎俯憐其心而允其推補各官及
考選科道之請使百職皆充而牧養有寄誠急
務也今正月丁巳夜火星逆行入太微垣占為
兵起有災天下大擾臣覩茲憂懼啟虔失圖今

東倭西播幸已蕩平北虜納款甘涼屢捷遼東
延綏亦就羈絡四方初脫湯火之危而財匱民
窮瘡痍未起方當與斯民以清靜寧一之福何
堪再罹兵災至於天下大擾臣中宵起遶階除
不能待旦伏計 皇上為社稷萬年主宵旰憂
勞更當倍蓰臣思所以解煩釋結有備無患敢
以此言進惟御墨一灑而惠澤普沾轉災虞為
吉祥化呻吟為謳歌易易矣

二月初
七日上

問安揭帖

題昨該聖濟殿提督太監崔文昇傳奉

聖旨召太醫院院使徐文元等進宮診視 聖脉

臣聞之不勝紆鬱隨從徐文元等細詢病原云
是積痰在內寒熱相激以致 聖體煩熱頭目

眩痛嘔逆惡心寢歇不寧宮庭咫尺阻奉 天

顏疴瘥相通瞻依彌切臣惟 皇上稟氣甚厚

福壽齊天區區陰陽豈能為患但今仲春節下

寒沍之餘威未解而彊陽之游氣已升稍失調

護則寒熱相激鬱而生痰眩暈嘔惡皆由于此
臣聞之醫家痰火之症多屬于有餘而有餘之
症相乘于不足一切飲食起居嗜欲喜怒皆寒
熱之媒能生痰助火不可不慎伏望 皇上順
時節宣無令外侵隨事葆蓄無令中滑則無妄
之疾自然勿藥有喜而萬萬年無疆之筭等乾
坤而並日月矣臣下情無任惓切謹題恭候

萬安

二月十五日上

紀召見 啟祥宮事

三十年二月十六日以 皇太子婚禮成禮部
請 上陞殿受賀有旨免 皇太子奉命于文
華門受賀羣臣行四拜禮

是日巳時 上急召閣臣及部院等官至仁德
門獨召臣一貫入啟祥宮後殿西煖閣時中宮
翊坤宮皆養病不侍側 聖母南向立稍北
上具冠服席地坐稍東偏西南向 皇太子諸
王羅跪于前臣一貫叩頭起居畢 上曰沈先

生來朕恙甚虛煩享國亦永何憾佳兒佳婦今
付與先生先生輔佐他做箇好皇帝有事還諫
正他講學勤政遵制度以日易月行礦稅事朕
因三殿兩宮未完權宜採取今宜傳諭及各處
織造燒造俱停止鎮撫司及刑部前項罪人都
着釋放官各還職建言得罪諸臣俱復原職行
取科道俱准補用朕見先生這一面捨先生去
也臣呼萬歲 聖壽無疆何乃過慮如此望
皇上寬心靜養自底萬安因不覺失聲 皇太

后太子諸王皆哭 上遽起就牀臣再奏云六
部尚書求去者三望 皇上諭令視事 上曰
兵部尚書田樂戶部尚書陳渠俱令即出供職
工部尚書楊一魁不塞黃垆口衝動 祖陵着
革職為民臣復叩首領命即幽擬旨以請

擬 聖諭揭帖

題今十六日伏蒙 皇上召臣于啟祥宮後殿
西煖閣面奉 聖諭臣謹擬旨一道傳各衙門
遵行以光 聖德以增 聖壽臣謹具題聞

擬上

聖諭開礦抽稅為因三殿兩宮未完帑藏空虛
權宜採用今着傳諭各處礦稅織造燒造俱着
停止鎮撫司及刑部干連前項犯人都着釋放
官各還職建言諸臣都着復職行取科道俱着

補用兵部尚書田樂戶部尚書陳渠俱着即出
供職工部尚書楊一魁失塞黃垆口衝我祖
陵着革職為民該部院知道

催發 聖諭揭帖

題今日 聖體違和特召臣入宮面諭 皇上
諄諄誨臣之言臣心以為萬萬景福無疆何至
過慮如此惟諭傳礦稅諸務釋放各項犯人收
錄建言諸臣補用行取科道留用戶兵二部尚
書而令工部尚書楊一魁為民等事此實 皇
上如天至仁臣當奉行隨即擬旨恭進伏候賜
覽即發幸甚臣仰見 聖容精彩略無滯氣
聖恩周詳允皆正理占知微恙旦晚必瘳昔之

人主有發一善言而災星退舍者况 皇上一
召見之頃而諸弊悉釐百廢具舉盡收天下之
萬善天神福祐豈有量哉凡人舉一惡念則凶
星煞曜將畢隨之舉一善念則吉星福曜亦畢
隨之臣知今日 聖念一舉而天地萬靈皆當
蠲災錫福 祖宗社稷無不呵護擁隨所謂人
所歌舞天必從之者此也伏望寧神靜養以承
天庥臣今晚宿直于朝房以伸擁扈之私恭候

諭旨

二月十六日上

奉 聖諭揭帖

題今日二更時該長安門守門官逋到 聖諭
開礦抽稅為因三殿兩宮未完帑藏空虛權宜
採用今著傳諭各處礦稅織造燒造俱著停止
其南京供應機房係舊制并蘓杭織造內官有
御用及婚禮袍服俱著照舊已採徵在官金銀
等件并織完裁疋燒完磁器還著原差內官押
解進用如有奸惡截阻及驛逋應付遲慢者指
名叅處鎮撫司及刑部干連前項犯人都著釋

放官各還職建言諸臣都着復職行取科道俱
着補用兵部尚書田樂戶部尚書陳藻俱着即
出供職工部尚書楊一魁失塞黃垆口衝我

祖陵着革職為民該部院知道欽此臣恭捧莊
誦不勝喜躍臣正對群醫遍檢醫書講求醫理
歷舉 聖體所患以問之具言決無意外不必
深憂蓋邪熱在內不食無妨四支疼痛夢寐不
寧目眩頭岑皆一時邪火作梗不為危証但觀
神氣如何若是凝定堅固即係佳兆臣言 聖

容和粹端肅望之儼然 諭旨字字真確有倫
有敘且藹然皆愛人利物之心長久遠大之計
群醫忝手稱慶共保無虞況今 明旨一下所
以造福于四海者無窮普天率土黃童白叟歡
欣踴躍萬口同祝天地神明有不聞聲感動而
陰相扶助者乎臣得此群醫之言如獲萬金良
藥輒敢奉獻以寬 聖懷惟 皇上耐心寧思
靜攝溫養脉理自調邪氣自退萬安之慶端有
日矣所奉 聖諭臣即傳各該衙門布告遠近

令共祈 皇上萬萬歲壽原帖尊藏閣中傳之
信史俾知大聖人作為迥出于尋常也

二月十六日上

繳還 聖諭揭帖

題昨夜恭奉 聖諭一道緣臣與各衙門俱在
朝房直宿當下悉知捷于桴響已傳行矣茲蒙
遣文書官取回臣敢不奉 命繳還但頃刻之
間四海已播欲一一收回殊難為力成命既下
反汗非宜惟望 皇上三思以全盛德大業以
增遐壽景福臣不勝忠愛之至

二月十七日上

錄內降各差三十處密旨

聖旨說與蘇杭等處提督織造兼理兩淮鹽稅等
務司禮監太監孫隆知道開礦抽稅為因三殿兩
宮未建帑藏空虛權宜採用其各處礦稅織造燒
造等項俱照舊行待三殿落成爾等行文戶部請
旨停止恐爾等不知旨意到爾即與各撫按等知
聞如有妄造謠言准爾即時指名叅奏重治不宥
該衙門知道

此旨竟從中發不由閣科

問安揭帖

題臣于十六日恭承特召面諭是時仰見 天
顏克粹 天語端莊占知偶感易愈適當復和
願萬萬安心無勞過慮昨詣仁德門候問聞夜
來寧帖不勝喜慰至于今日知益豫安此誠天
地百神默相顯助之徵也臣竊念之九閤閔嚴
百僚人衆不宜使之屢至大內且當人心瞻望
徊遑之日尤宜鎮靜以安之臣今不敢復率諸
僚入問但令各歸衙門辦事矣惟臣一念狗馬

戀主之誠不能自己伏望崇攝天和省思省事
一意靜養以凝泰禧臣不勝惓惓祝願之至謹
具奏恭候萬安以聞

二月十八日上

擬上三諭揭帖

題今日文書官劉用捧出

聖諭朕前眩暈召卿面諭之事且礦稅等項為因
兩宮三殿未完帑藏空虛權宜採用見今國用
不敷難以停止還着照舊行待三殿落成該部
題請停止其餘之事卿再酌量當行的擬旨來
行欽此臣懸念 聖躬日夜瞻盼得見近臣恭
詢動定知己汗解不勝喜躍捧誦諭旨輒此回
奏臣惟老子有言身與貨孰多蓋財貨乃身外

之物比夫軀命不啻天壤之懸隔也今 聖體
初安豈盡復舊正宜倍加崇攝凝承天禧安得
以區區外物而妨內養臣願 皇上且勿以此
事輾轉于懷寧心澹神保身保民幸甚容臣三
思再奏其事在不疑者臣謹擬 聖諭三道惟
即允發預慰中外懸懸之望臣無任懇切之至

二月二十日上
二十一日奉

聖旨朕覽卿問安回奏具悉忠愛懇切已知道了
該部院知道

諭吏部都察院朕惟行取科道待命日久况各差
缺多妨廢政務你部院屢次列名擬職朕已具知
可着即到任管事仍具本題知

二月二十一日下

諭吏部朕惟建言得罪及因事誥誤諸臣懲創已
久人才難得不忍終棄你部備查起用復還原職
便具寫來看

不下

諭刑部鎮撫司及你部犯人凡係礦稅及建言誥
誤的都准釋放各還職役便開名奏知

不下

問安揭帖

題頃自聖體違和犬馬私情不勝煩結天
顏咫尺弗獲時奉起居皇上一身神靈所護
羣臣百姓禱籲維虔如天之福何恙不已惟望
寧神靜志省思慮調藥食以迓天庥臣下情無
任惓惓謹具題恭候萬安以聞

二月二十
二日上

問安揭帖

題臣比日阻奉 天顏私衷懸戀不遑寧處玄
穹垂佑萬福所歸伏想 聖躬日就清泰臣聞
却病之法寧神為要藥餌次之伏望澄思遣累
怡養天和以縉遐祉臣不勝惓惓謹具題恭候
萬安以聞

二月二十五日上

四 聖諭處南太僕留二卿揭帖

題今日文書官傳出

聖諭發元輔諭內閣朕今日覽文書內見太僕寺卿南企仲一本不以君父為重專市私恩新舊建言奉旨降革諸官都不准復職因礦稅干連人犯都着刑部鎮撫司照舊牢固監候不許容縱南企仲本當重處姑且降一級調用不許朦朧推陞李戴蕭大亨奉公守法都着即出照舊辦事不許煩辭奏擾該衙門知道欽此臣自瞻

奉 天顏以來已經旬日九重懸隔無由數侍
起居依戀殊切今日恭奉 諭札仰見御筆題
封精彩飛動既占萬安及捧誦 聖諭中間處
分諸事并慰留李戴蕭大亨益見思慮周詳精
神溢發臣不勝喜躍不勝慰藉 聖體初安珍
攝為上一切外事皆當屏除臣當傳示二臣令
其即出供職勿為煩辭瀆擾以勞至尊在 皇
上亦望澄思遣累太虛順應不復以瑣事實念
懋迓無疆之福其建言待罪諸臣曠稅干連人

犯聖心既加憫惻德音必有沛時恩在朝廷
誠非人臣所宜私市惟望皇上以天地為心
廣大為德無因臣下之煩言久留已發之盛意
為天下錫福赦罪乃所為聖躬增福除災也
愚臣不勝惓惓

二月二十七日
上

不傳 聖諭揭帖

題今日文書官傳出

聖諭諭內閣朝廷開徵礦稅等項為因兩宮三殿未建帑藏空虛權宜採用昨已有諭但傳聞未定卿可傳示該部院即便行文與各處欽差內官并撫按等官還都著照舊遵行待三殿落成題請停止如有抗拒不遵的一體治罪不饒欽此臣惟今日之事 聖躬為重思慮動作所妨實多宗廟社稷之身華夏臣民之主伏望 萬

分珍愛新愈之時即一飲一食宜少不宜多惟
在聖心自加斟酌左右前後諒不敢苦口節
縮也臣狗馬微忠恨不能以身恭代輒此附陳
所奉聖諭臣宜傳行但臣受皇上大恩一
有差馳悔之無及輒敢細籌而深計之以俟
聖裁皇上既云罷止有時何必多申諭旨此
諭若傳不惟不能禁人聒擾而適足以招人聒
擾皇上聰明如神于此偶未加思思之則知
此諭雖嚴部院能帖然遵奉與各撫按乎臣知

必執奏矣彼撫按官亦豈能帖然遵奉而無後
言乎臣又知其必執奏矣科道及南北兩京十
三省官亦豈能默默而已乎臣又知其必執奏
矣是天下本無事而朝廷自生事出一題目與
人做文字誰不攘臂而起也如此則是臣方勸
靜養而反至于增煩臣心何忍臣罪何逃既聒
擾皇上必交章攻臣臣不能一日事皇上
矣昨吏部刑部止以請命未得彈章隨之雖有
明諭猶皆閉門不出二臣如此臣身可知臣身

若經一攻萬無苟容之理此時恐動 皇上一
番氣惱費 皇上一番處分臣不足惜顧非國
家之福也展轉思維未敢輕傳伏惟再加斟酌
慎重絲綸臣自知不肖不稱任使惟復別有處
分統惟 聖裁

二月二十八日上

言田本與揭帖

題今日蒙發兵部尚書田樂告病十三懇疏到
閣擬票臣惟樂乃皇上特諭所留之官理應
擬留且本官實忠誠任事前撫西陲用兵數載
屢推大虜恢復松山未嘗請朝廷一兵一馬一
絲一粟而坐收百年所無之功目前諸臣未見
其比既任本兵無論籌北籌東悉中機竅而平
播一事慷慨討賊萬里料敵如在目前故役不
再舉而逆賊就誅也臣實敬服今天下不為無

事而樞筦重司有如此人誠不易得顧其性資
率直不能委曲從人待下尤嚴未嘗少假詞色
成功固由于此而召謗亦由于此乃謗者謂小
事不足以傷之於是辱以汚名毀其大節而本
官素矜名重節發憤抱病累書及臣誓以必去
為期矣臣仰體 聖意俯念時艱誠不忍其去
然留之愈久則攻之者愈多徒令抱不白之冤
而增終身之恨則愛之為害尤所不忍茲不得
已而有此票望俯亮允從全彼實多他日用之

再召未晚庶本官得全晚節而國家亦儲不盡
用之大臣以為重也如 聖意必欲留則請御
前特札召吏部接出以彰厚眷以鎮群囂庶可
挽其去志耳非臣敢擅擬伏冀 聖裁
閏二月初三日
上

請三事揭帖

題恭喜 聖躬萬安集和凝粹天地日月若重

開朗宗廟社稷若再奠維宮庭侍衛抃手歡呼

百官萬民喜色相告臣託在股肱義同心膂愛

戴踴躍倍萬恒情仰惟 皇上素精攝衛博通

醫理萬祈益苾于新愈之後謹調夫寢膳之節

申戒左右時進箴儆止聲色薄滋味禁嗜慾平

喜怒神常恬淡則憂患不能干氣常清和則客

邪不能襲臣觀昔人養生之論大抵以虛靜和

平為要如云養心莫善于寡欲又云養身者以
煉神為寶又云養性者善言不可離口又云養
性者須先知自謹又云善養生者清虛靜泰養
之以和此皆名括之格言尊生之妙訣也唐臣
柳公度嘗自言吾平生不以氣海暖冷物不以
元氣佐喜怒故享年八十有九此尤可法臣不
勝犬馬戀主之私敢為區區美芹之獻至于朝
廷政務諸司亦自支持惟各處缺員尚多未補
治河錢糧無從處辦此係當今最急且關聖

心又臣前者面奉 聖諭四事但蒙 俯允行
取尚有三事未見舉行致使日新之德久蘊而
未揚如天之恩久懷而未暢天下歡忻歌頌之
聲又為呻吟顰蹙之狀殷勤 德音對臣發鏤
心刻骨臣何敢忘默而不言現今慚負非所以
厚望臣之意也敢祈 皇上于夜氣清明之時
虛心遠想政事孰疵孰美何為遜其美而徇其
疵利害孰少孰多何為舍其多而圖其少知而
不行何取于知過而不改是謂之過特施勇斷

為世造命此在幾微之自回不待臣工之苦口
有如積習難于遽捨三事未即並行亦乞次第
敷恩後先相望行一事天下亦戴一事之仁寬
一分百姓亦受一分之賜使饑渴望治之衆水
火倒懸之人稍有慰心猶存冀心信朝廷無
反汗之綸頌明主有解網之日祝祈聖壽
時萬無疆詠歌聖名昊天罔極則豈但臣民
之福實皇上之福也臣以多病微軀獨當大
任憂時憂國常切亂虞既負隆恩復乖素志耿

耿顧名之心比之顧身實重竊以愚臣之心仰
揆聖主之心大小雖殊當不甚遠如得早了
三事復完前美譽孽不萌太平如故則皇上
一日而與二帝三王並傳懿鑠臣亦一日而得
攀龍附鳳預沾榮光上下同庥君臣相悅豈不
亦千載一時大快事也臣無任披瀝懸望之至

閏二月十
五日上

趙侍郎可兵部揭帖

題今日伏蒙欽點吏工二部侍郎到閣擬票臣
不勝欣喜服 皇上睿智知人之明而賀朝廷
得賢才之用也其兵部侍郎尚未蒙點意者所
推係見在各部院及各巡撫 皇上不欲輕動
耶臣竊觀其間有積資積勞可備任使者一人
趙可懷是也敢不避嫌疑為 皇上薦之按可
懷係嘉靖四十四年進士萬曆十年以副都巡
撫福建又巡撫順天巡撫陝西間住起為南京

操江二十二年陞兵部右侍郎巡撫應天入為
工部左侍郎資望既深閱歷又熟不宜復出為
巡撫但以舊年四月楚中變動臣奉 聖諭處
分倉猝之間顧瞻廷臣求其忠誠練達決能輯
寧重地以寬 聖憂者惟此一人故保舉以往
然本官已為侍郎七年為巡撫二十年而仍令
以侍郎巡撫不加一階則臣時不暇慮及即本
官至今亦未嘗一言及此也乃臣靜思實為缺
事況本官到楚不動聲色而亂戩悉安才誠兩

合不負委寄之重矣多事之秋兵樞之任召還
回部惟此允宜若念其微勞似當照先年邢玠
例陞右都御史管左侍郎事尤見 聖恩特注

之重臣非敢私于可懷也求賢圖治本臣職分
而況可懷之不遷臣實為之又不得不為亟請
于 皇上也今楚地已寧料無足慮而得一賢
臣在朝署間裨益實為不小伏惟 聖明鑒允

特賜簡用

閏二月十
七日 上

日講揭帖

題為日講事伏覩 皇上自臨御以來典學時
敏學庸語孟之外五經則易書詩禮俱已講過
見今大學衍義講章又將進完相應接續臣惟
春秋係聖人筆削之書可裨 聖學尚未進講
又惟我朝 太祖高皇帝 成祖文皇帝 聖
德神功比隆三五嘉謨善政載在寶訓皆可為
萬世子孫法程或將兩朝寶訓進講其于 皇
上羨牆之見尤為親切伏望 欽定一書容臣

率領講臣預撰講章待大學衍義完日接續進
講臣未敢擅便謹題請旨

閏二月十九日上

辭寧鎮捷恩第三疏

奏為過寵難承惓忠非矯萬懇 聖慈必容辭
免以寬慚負事項臣以寧鎮捷功加恩再疏辭
免蟻忱已竭 天聽愈高伏念臣待罪股肱典
司密勿與邊鎮將士之任不同往時軍功之賞
或及閣臣必進止預其機宜撫剿叅其籌畫雖
未親行陣之事實已多帷幄之謀故雖受之不
為僭忒若夫賞不當功功不副賞前此閣臣亦
每每控辭矣然則邊功賞及閣臣固舊典也閣

臣不與邊賞亦舊典也寧鎮之捷實邊臣遵循成畫以力戰得之不煩臣等一籌一慮而捷來始知故文武將士誠宜恩敘臣雖朝夕在公而原無勲勞又何能覩受也況今皇威布昭武功稱競士有不勝賞者而止戈為武臣每以口不談兵為皇上願之夫士有不勝賞則臣不宜從旁掠其賞兵既不願談臣又不宜從中領此賞臣瀝控再三底裏罄盡初無飾詞亦非矯節伏望俯加憐察追寢前命庶恩無濫私而臣

亦獲遂本願此實 皇上所以眷愛臣之深者

也

閏二月二十四日
上二十五日奉

聖旨朕嘉寧鎮二次捷功文武將士同心僇力卿
為元輔殫竭謨猷調燮贊襄勲勞懋著加恩示酬
原不為過卿乃三懇情詞愈切具見忠慎至意特
准辭免成卿勞謙之美該部知道

言李贄揭帖

題今日發下票本內三本奉有口傳

聖諭除兵部吏部各一本謹遵票上外其錦衣衛
拿獲李贄一本傳諭著送鎮撫司打問欽此臣
惟欽拿人犯送鎮撫司打問原是定規但訪本
犯年已七十六歲形體羸弱伏覩大明律開載
老幼不拷訊雖有罪犯止于贖銅此聖祖優
老仁厚至意臣不敢不請今以其惑世誣民而
拏問以其年齡衰老而輕處此誠仁義無盡之

道也臣謹擬上兩票惟乞 皇上從寬發下免
其拷訊以弘 聖德臣不勝惓惓

閏二月二十日上

請講寶訓揭帖

題為日講事照得大學衍義講章將及進完臣
前具揭以春秋及太祖高皇帝成祖文皇
帝寶訓二書上請未蒙批示臣伏思之稽古
不在遠求憲章莫如近守春秋世遠事與今殊
聞見可資法戒未切惟兩朝寶訓二祖之嘉
謨善政備載其中一事一言皆可為法較之經
史尤為親切以此進講則陟降在廷羹牆若見
比之春秋為益必大伏祈定示以便進講臣謹

將太祖寶訓十五卷繕寫裝潢進呈其成
祖寶訓尚候寫完續進緣係日講事重前書將
完不可復遲輒爾催請謹具題候旨

閏二月
八日上

救前任科道揭帖

題臣抱病未瘳日求醫藥動便生火流汗浹背
僅恃一粥勉強難前仰藉隆恩許臣在寓擬
票尚得不廢公務然久違闕庭心如針刺容再
寬假數日誓不敢偷安以負超常恩遇也今日
聞吏部接出諭旨因新進科道蕭近高等妄
言罰俸一年而追及在前沽名之臣降革有差
臣不覺心驚而欲仆口呿而難合如是者移時
也臣與各部院官不能正身率人奉職循理方

自慚咎今奉此諭竊恐大小臣工增多貽擾則
上何以仰頤 聖心順適起居下何以肅清
朝廷載其清靜哉舊規科道官進衙門無一建
白人便以為無風力故每每搜尋挑剔以見其
長習尚固然無足怪者在朝廷可採則採之不
可採則置之耳今蕭近高等三臣妄言干威罰
俸示戒臣何敢為之申救若在先諸臣時移事
改懲創已深 皇上近旨准其起用今不惟不
用而又追記其過以加之罰則回視起用之意

不亦大相懸哉必非 皇上本意特為三臣所
激而不覺移怒至此耳伏望廓天地之心開日
月之照除蕭近高等罰俸如舊外其鄒元標等
准免追處則至公至仁之心照然于天下而多
言哆口之風亦不禁自息矣臣托股肱所祈朝
端靜定 聖心安寧特用縷縷以干不測之恩
不勝瞻睇之至

三月初四日
上初六日奉

聖諭朕覽卿所奏具悉已知道了朕怒南企仲於
君父有恙之時輒敢妄言狂肆無上今乃唆使兩

衙門新進官不論是非擅逞胸臆屢行激擾已從輕處了卿今在告既來懇奏降二級的姑且各罰俸一年降雜職的各降一級用革職為民的照舊留用特諭卿知卿可傳示吏部知道如有再行黨救瀆激的都還一體重治不宥

謝前事揭帖

題今日伏蒙 皇上遣文書官劉用傳出 聖

諭 云 臣恭誦 恩綸不勝喜躍臣聞之詩曰

周王壽考遐不作人此詩人頌文王久道化成
成就人才之多也 皇上御極以來陶鎔俊彥

光佐太平濟濟在位一時嚮用之士亦莫不爭
自濯磨以思報効譬之群駿交馳于前泛駕者
或亦時有貴在控馭有法操縱得宜則六轡在
手有致遠之用而無僨輶之憂矣今新進科道

狂言觸憲 皇上欲加裁成追咎既往以示創
艾旋蒙開霽賜之曲全仰見雨露風雷無非至
德恩威互用仁義並行此正壽考作人之妙用
陶鎔御之微權也臣實心服心感踴躍忻頌謹
即傳示吏部遵行其 聖諭尊藏閣中以傳永
世臣謹具回奏陳謝以聞

三月初
六日上

請加恩禮部揭帖

題臣惟 皇上薦念天經斷成太禮冊立 皇
太子冊封 諸王尊上 聖母徽號及冠婚諸
禮悉皆告成兩詔天下普天同慶如臣不肖亦
蒙誤恩今又遍賞六軍行將大賚百官德澤至
隆浹矣惟是禮部各官夙夜在公與臣往復商
訂助成盛美臣既濫叨豈能獨安而不為之請
乎臣思邊功陞賞尚及戶兵二部況此曠舉千
載一時伏冀 聖慈俯加敘賞謹擬諭旨一道

上進恭候

聖明裁定

三月初七日

諭吏部冊立冊封尊上徽號及冠婚等禮具
成禮部官夙夜寅清勞勩可嘉尚書馮琦着加
太子少保賞銀四十兩綵段三表裡侍郎朱國
祚賞銀三十兩綵段二表裏兼官各如故都給
與應得誥命該司郎中王紀着陞五品京堂用
與禮科都給事中張問達各賞銀十兩其餘儀
制司及禮科官俱賞銀八兩

報入閣揭帖

題頃臣以衰病侵尋骨力難強噓氣欲絕舉趾
畏顛不得已哀籲 君父之前乞假調理伏蒙
聖慈矜許令暫就私寓票擬本章幸寬療曠之
誅已荷高深之造而復承眷渥問疾醫來分甘
錫貺望闕拜命感涕橫集苟延喘息皆 皇上
生成之賜也身非臣有捐糜何辭但日已迫于
崦嵫力不任夫驅策終恐有負眷倚是用耿耿
謹於今日廷謝入閣供事外具題陳謝以聞

十三日奉
木日奉

聖旨覽卿奏謝今日入閣贊襄朕心慰悅已知道
了特諭卿知

言寶坻牧場揭帖

題伏蒙發下御馬監太監徐銳一本內言牧馬
草場坐落寶坻等地方原有一千三百餘頃被
豪民侵墾殆盡要差典簿官一員往彼丈勘等
情臣恭票上兩次發下再票臣惟國家之事無
一不經由六部臣在閣中豈能知其委曲即
皇上至聖至明深處九重亦豈能知其委曲安
可遽遣中官往勘哉縱使真知可行亦當經由
六部此 祖宗之制也 皇上之制也臣不敢

欽定四庫全書
卷一百一十五
三
素伏乞 俯從前票幸甚若不可使六部知之
豈可行于天下紀綱一亂天下即亂今年災惑
逆行占為兵戈並起天下大擾臣常憂之望
皇上大更前轍萬一亂起 皇上能與一中官
共弭乎中官外官皆 皇上之官奈何偏聽而
輕以 祖宗之天下嘗試也臣亦知承順 聖
意可幸無罪然區區一念忠義求不負 皇上
委托之重輒此苦口乞將此本留中具見保惜

金甌至意

三月十五日上

言田本兵揭帖

題今日發票本內有兵部尚書田樂一本苦切
求去臣惟樂為聖明特眷勉留甚遭逢矣柰
其命窮時蹇屢被叅劾半年之內自救不暇精
神分越意氣消阻雖復留之恐其顧忌人言難
以展布而不能奮勇擔當如舊時也軍國大事
可為寒心凡人既為人所疑縱行好事人情儘
從歹處推求誰肯向好邊體亮此既一機械彼
亦一機械意氣相吞口吻相刃廟堂之上祇成

聚訟安能復論公家事乎 皇上既眷樂之深

宜聽樂之去一去則其心迹自明不去則愈爭
愈繁而愈不可明非樂之利亦非朝廷所以保
全功臣之道况暫令致仕欲用則再召未遲也
臣謹擬票上惟 聖明允發

三月十七日上

言黃河事揭帖

題臣惟黃河西決事干 祖陵又干運道皆國家極大政務而河臣李順既患危病治河錢糧又無所出該吏部已推曾如春等上請未蒙點用工部亦請九卿會議錢糧未蒙允發衆心遑遑惟恐失時不治為患日深伏乞將二本檢發臣惟河臣之病固因決口難塞下流難濬實因錢糧重大不能轉手無米之炊巧婦不能情可悲憐病非假托 祖陵王氣乃皇家萬萬世運

祚之所發祥 聖躬萬萬歲福履之所鍾粹豈
直運道之為京師咽喉而已夫救水火者不能
待遠今河南巡撫曾如春見奉 旨料理但未
即真耳若賜點用尤為得人所需錢糧亦難責
地方出辦僉欲各省協濟及多方搜取事在燃
眉亦乞早命集議臣不勝惓惓

三月十九日

三輔臣存問錄廕揭帖

題今日發下文書內有原任輔臣申時行王錫爵王家屏等三本俱為存問謝恩事查得先年內閣致仕輔臣劉健謝遷王鏊徐階等蒙賜存問各遣子孫來京謝恩俱奉 特旨廕授中書舍人乃優禮舊臣彝典今時行等感荷洪恩遣其子孫賫疏來謝對颺 光天之聖德似宜照劉健等事例錄廕以示恩禮以作臣忠臣謹擬票上進未敢擅便請 聖裁施行

三月二十
六日上

請東宮講讀揭帖

題本年閏二月以來該臣兩以東宮講讀擬日上請俱未允發臣惟良玉雖珍必俟琢磨之力睿咨雖美難忘溫習之功是以時不可虛學不可廢而臣之請不容已望於本月初六初九二日內欽定一日出講臣不勝待命之至謹題請

旨

四月初一日
上初二日奉

聖旨是東宮着於初九日照常講學該衙門知道

廣東稅事揭帖

題臣連日接廣東按臣揭帖深憂此方窮海雜
夷之處輕心好亂之民稅使太虐稅額太多必
至群起譟呼挾夷造反事勢已極近在目前今
其變亂事情已數見矣臣兩次票本擬減稅額
照依江西無虔鎮之數以昭德意尚未蒙 發
今日復接新差廣東巡按林秉漢揭帖臣反覆
看詳此本字字句句皆經斟酌有小心敬上之
至忠有體國卹民之遠慮與尋常只請停止者

大異敢祈 聖明特加覽觀採擇而行臣細思

之廣額委實太重不可以經久行李鳳委實太

虐不可以一朝居如蒙 皇上減其額數德意

甚盛若不減額則止將李鳳取回而命李敬代

之亦是美事李敬為人存心忠實必能仰體足

國裕財之意又必能仰體安邦弭亂之心收徵

採之益釋南顧之憂此兩利而俱便之策也百

姓方歸心于彼而 皇上又托重于彼有司可

與調停夷夏可與安戢從此廣東無反側而

皇上亦免聒擾矣此事甚易行甚易從望斷而
行之四月初二日上

言稅契銀揭帖

題該南京守備太監邢隆一本據羽林衛指揮
同知袁順時奏徵收徽寧二府買產稅契銀十
五萬兩請給勅書關防奉 聖旨是勅諭關防
都准與他該衙門知道臣惟自礦稅事興勅使
四出每遣一使則萬民之膏血立見焦枯一方
之生靈坐歸塗炭至于今日乃民命已絕而一
線求生之時事勢已窮而萬分當返之日泣籲
皇天及早悔禍縱不悉改亦當稍寬以無虛二

月十六日之德意所庶幾也天下人心方望免于此而皇上催取勅書乃更加于彼如水益深如火益熱皇上至明主也請試三思彼天下窮民亦各有智亦各有力肯甘心束手以就焚溺而更無一避水火之他策乎興言至此臣心悲痛有大不忍出諸口者矣稅契之制起于民間買產恐有後爭朝廷立法每十年造冊之時為之官印契尾以資信守因而稍稅紙錢非為利也祖宗以來至于近年每兩不過三釐

萬曆二十六年戶部因邊餉無措題奉欽依每兩增至三分載在考成見充正供濟邊之數已為非藝之征今又收入內帑則戶部錢糧益無出辦而不免于束手待斃矣且戶部原題止云盡天下歲入可得十萬蓋知此利甚微不能過為搜取也今原奏官乃云徽寧二府可得十五萬何言之太易耶借令可多戶部當先多之矣蓋每兩三分每十兩三錢積而計之必契價至五百萬乃可得稅銀十五萬彼徽寧二府土田

幾何雖使寸地尺田無不換主亦決無五百萬
交易之理十五萬稅從何取哉明是奸人賺此
一勅以為百計誅求之端陷穽之中又別開一
畚大陷穽虎狼之外又別放一番大虎狼小民
何辜禍至此極尚有肯為皇上之民而不生
異心造異謀者乎臣待罪密勿不能補過拾遺
還日月已食之明而乃依違澶忍增乾坤未有
之障大負恩知大壞名教萬世之罪人耳此事
委實難行伏望深惟利害追寢前命免寫此

勅生靈幸甚宗社幸甚不然則 明示邢隆循
每兩三分之制隨其稅銀多寡盡數解進不必
拘定原數其原奏土民吳良輔方坤成等不許
前往預事以恣虎噬狼吞之謀止令有司訪奸
緝弊毋容漏卮則人心不驚國課有出雖有妨
于戶部猶無損于 皇仁臣不勝瀝懇之至

十五
日上

言趙邦清揭帖

三臣謹題蒙發巡撫賈待問郎中趙邦清二本
并邦清所進揭帖文籍等件到閣擬票除賈待
問本照常票擬外其邦清本臣等從公秉正看
詳竊惟國家典制凡官員既被叅論即閉門席
藁待罪恭候朝廷處分所以尊主權明臣節也
若許人人得恣情胡扯哆口強辨則奸雄肆惡
讒說亂真朝廷之上日成聚訟更無休息之時
而國家紀綱法度陵夷盡矣前此大臣有一辨

者而人尚引法繩之曾是小臣可容憑陵無禮
數煩擾于 至尊之前乎果見有不公不法何
不早奏而乃至自身敗壞方來瀆陳明係仇攀
無實落水拖人不足信明矣且抄沒一事原為
謀反大逆及偷盜內府者而設官員犯罪小則
罰降大則褫奪 祖宗定典世世守之邦清輒
請抄沒以明貪廉邦清既能請抄豈不能先行
藏匿逞氣妄發輕易如此其人深險不端可知
且視 皇上為何如主而輒爾妄言臣等不敢

許為正人也舉朝畏之如虎臣等常謹避之今
奉命擬票有難隱諱但臣一貫前日所擬之
票不知邦清何故能輒知之當面質臣臣實危
甚皇上若再不行臣之見噬不遠矣惟乞即
賜處分幸甚臣等謹密奏聞

四月二十五日上

河工事宜揭帖

題昨蒙 諭發馬價以濟河工具見 皇上注
念陵漕德意但京師外庫錢糧更無他積獨此
馬價一項耳邊餉已借百萬今又借三十萬儻
有本寺急用于何取資且河工浩繁又非三十
萬所能即了尚煩宵旰不容但已臣等敢獻一
籌切照往昔河漕所以久而無救者實以歲修
不輟之故而所以能歲脩不輟者實以河道頗
有餘積之故自稅使搜括以來所在罄竭如洗

遂令工作無資束手因循而河乃決裂今至借
馬價索搜括不休譬猶方喂饑人以食而復割
其肉豈裨無益大憂立見謂宜明勅稅使毋復
將河道錢糧搜括毋復將河道工程騷擾同心
協力以圖裨助而後河有可治之時此不過費
皇上一言殊勝許多區處也自礦稅來皇上
屢有不許加派小民之旨天下財力止有此數
有司既移東那西以供諸監之求矣若不加派
于何取償故有明加有暗加明加尚有數目暗

加不可勝窮 皇上安能盡知乎今工部措處
豈有神運鬼輸之術不過議加派耳而不得不
與前旨背矣伏想 聖心至仁能忍于此乎昔
孔子稱禹無間然卑宮室而盡力于溝洫今河
漕之急豈直溝洫之微而可停工作豈止宮室
一事倘蒙 皇上曲賜搏節以省浪費則雖不
免于加派而天下猶諒朝廷不得已之心也又
河道疏塞之議譬諸作舍道傍從來難定頃總
河侍郎曾如春書來言山東巡撫黃克纘偏執

王家口不可開之說而其所轄道府無敢明目
張膽以持忠議者事勢人情終難歸一究竟必
祈遣官一勘始可定囂臣等看詳此意甚以為
宜蓋非謂遣官才識便能出于當事者之上謂
其既膺特命諒秉至公可以折衆論之衷可以
杜紛紛之口故凡舉大事必有勘差昨工部一
本為陵運關係匪輕河工議宜歸一謹循往例
懇乞 聖明特遣勘臣以圖成筭以裨永賴事
專為此發已經票上未蒙 允俞臣等以為此

一勘科必不可無乞俯賜檢發更祈 天語丁

寧委任責成無任瞻睇之至

五月初六日上

熱審揭帖

二臣謹題近該刑部欽奉 聖諭讞審矜疑等

項人犯康夫山等三十七名分別奏請未蒙

省發臣等竊惟熱審之制乃 聖祖感天時之

蒸鬱憫狴犴之傷殘酌量罪情間行開釋即三

代聖王孟夏出輕繫仲夏挺重囚之意累朝以

來歲歲舉行 皇上御極尤深軫念今歲以四

月發諭至仁也該部於九百餘人之中讞審止

二十七名亦既詳慎矣而乃久留不下豈以萬

幾殷繁偶爾遺忘乎不然何為 皇上發不忍
人之心甚易而行不忍人之政乃難哉至于鎮
撫司人犯從來打問過即送刑部擬罪不過暫
時羈候無久監者今查淹滯積至一百二十六
名該司地不盈一二畝房不滿十數間四面與
市井闐闐僅隔一墻地方湫隘既無所容日夕
隄防又難施力强竊雜處恐生逋竄之奸臭穢
薰蒸時有瘟瘡之染如罪在不赦自當速正刑
章或情有可矜亦須量從寬貸入不明罪狀出

不見天日槩幽黑山同繫長夜如此炎熱彌難
喘息誠可憐也今各省直矜疑踈放之章 皇
上不靳俞允豈其輦轂之下反有所遺况二十
七等年該部朝審兩疏亦尚未發臣等竊厚望
于今日之併行光昭如天好生之盛德矣盖自
大典告成之後恭值 聖體萬安國家莫大之
慶相仍而至錫福庶民周徧海宇此輩亦覆幬
中之一物而獨不得少霑恩餘非臣等踈于啟
導乎今何敢過望肆赦但乞稍與踈通在刑部

則讞審諸囚視其尤可矜者寬釋一二在鎮撫司則問過各犯通送法司輕重擬罪解得一分亦一分之賜早得一日亦一日之恩使垂死諸囚猶荷高深之造而鎮撫司官校亦緩隄防之責免累及之虞拯此溺焚感通和氣所以集萬福增萬壽端在此也四月初旬傳出聖諭一腔惻隱已自勃發豈至今日更生遲疑惟亟俞之臣等無任企悚待命之至

五月二十四日上

催發二事揭帖

二臣謹題臣等連日敬進二揭一為都察院請
考實授事一為法司及詔獄犯人熟審事皆臣
等積日累月困心衡慮雖欲姑置之而不能自
遣者蓋御史中差以下久已缺人不考實授則
不可差遣在京師則虛積于無用之地在各處
則久不得一人之用試御史在臺在差亦何加
損但都御史苦于叢責而無以應之有人而不
得用與無人同如有手足而繫縛之與無手足

同烏能已于懇也至于各監犯人例有熱審前
此懸望以日為年既及其期而猶缺望何能為
情今年毒熱倍常踈散猶難度日哀此桎梏真
如烹烙 皇上仁心已發仁政宜施蟻亦感恩
蛇能報德此輩靈蠢雖異諒能祝 天頌壽而
不忘也伏願 俯採芻言將臣等前次二摺省
覽批發以昭普運之慈以增齊天之福

五月二十八日

上

陝西織造揭帖

題該工部覆陝西織造袍絨本臣等票上蒙發
改票臣等竊惟袍絨乃上用急需每歲發票臣
等未嘗不將順惟至今日真有萬分難處不得
不從該部請乞之意者蓋連日該部堂司無一
不到朝房蹴踏哀訴該部錢糧缺乏見存止有
銀一百二兩而內宮之鼎建婚禮之備辦以至
于河道之資給日夜攢集萬分難支皆以得解
官罷去為幸臣等責以大義以為事如難處宜

為明主惓款言之必當俯從豈得含情不言是時臣等亦許為代請也比發票時臣等固欲言之但倉卒不暇耳茲若改擬臣等安能置辭據本中所言戶部當出三萬兩工部當出七萬兩以徃時論之此亦易處願在今日則視三萬不啻如三十萬七萬不啻如七十萬彼得一錢且應燃眉之急耳諸臣之意尚欲祈皇上輒停可已之工專供婚禮與邊餉以成啟後之大禮以定安攘之大事然後惟皇上之所欲為也

皇上必欲如舊時造辦取盈力必不堪徒滋多
事矣既蒙發改臣等何敢固執不得已將暫停
織造一年以後還候 旨行字樣改為暫緩織
造一年以後補造進用兩票皆上惟 聖明深
思遠慮俯加採納臣等不勝惓惓

六月初八日上

言稅契揭帖

二臣題臣等在閣曾接得御史金忠士揭帖為
土棍鑽刺殃民監臣徇私釀禍等事此本已上
數日未蒙發票輒敢為之一言臣等看詳得查
理稅契一事取利最微而釀禍最大將江南百
姓毛櫛髮爬無一家一人放過誰能受此苦楚
竊恐十五萬之稅未得而殺人屠官之禍必起
臣等實不放心實難坐視莫若仍照勅書令邢
隆自管自徵不拘原奏數目不許原奏干預庶

幾隱憂可緩國體無傷而免致他日宵旰憂勞
所得比稅錢多萬萬倍也伏望 皇上將金忠
士本留神省覽批發仍不許土民前去辜甚幸
甚臣等不任惓惓之至

六月二十九日上